



UNIVERSITÄTS-
BIBLIOTHEK
PADERBORN

Regale Sacerdotium Romano Pontifici Assertum

Sfondrati, Celestino

[Sankt Gallen], 1684

§. IX. Respondetur ad objecta.

[urn:nbn:de:hbz:466:1-63125](#)

audimus: si statuit, non credimus: si appellantes recipit, tumultuamur;
 & tamen obsequimur. Quis enimvero non dicimus Rex aliquis aut
 Princeps, sed vel Paterfamilias à servis à filiis hoc obsequium ferret?
 Faciant ergo quod dicunt, & absoluta res est, aut si non faciunt, saltem
 nec dicant, ne ludibrium inobservantiae adjungant.



§. IX.

Respondeatur ad objecta.

Summaria.

1. Posse Papam in hæresin personalem cadere, non doctrinalem.
2. Non ideo frustra esse concilia, quia Papà falli non potest.
3. Posse Pontificem sine Conciliis necessariam dogmatis definiendis industriam adhibere.
4. Cypriani contentiones magnum argumentum esse infallibilitatis Pontificiae.
5. Cur Pontifex hæresin docer non possit?
6. Quid de erroribus S. Petri?
7. Et Zephyrini?
8. Et Liberij?
9. Et Felicis?
10. Et II. Gelasij?
11. Et Vigilij?
12. Et Honorij I.?
13. Et aliorum Pontificum?

XXX

15. Non

530 Lib. III. §. IX. Respondetur ad objecta

15. Non semper Pontificum constitutiones ad fidem per-
tinere.

16. Errare possunt in questionibus facti, sed non omni-
bus.

17. Post Concilium Constantiense de fide est, hunc in
individuo legitimum esse Papam.

18. Contrariam sententiam nec à ratione, nec ab au-
ritate probabilem esse.

I.

Proponitur 1. Sancti Patres, ipsique canones dicunt
Pontificem in haeresim lapsum judicari à Concilio
debere, supponunt ergo posse in haeresin incidere.

Resp. Canones expressè loqui de errore perso-
nali non judiciali: hoc est, posse Pontificem hereti-
cum esse, non posse haeresin publicè & è cathedra
docere: hoc nos solum negamus, hoc Petro & Ec-
clesiae promissum est. Error enim personalis, aut occultus est, aut pri-
vatis scriptio[n]ibus à Pontifice, & sine imperio inspersus, Ecclesiae nihil
nocet, cum omnes sciant Pontificem extra cathedram errare posse, nea-
lliusr privatas opiniones alio animo, alióve vultu, quām privati Docto-
ris legant, tantumque illis tribuant, quantum ponderis & rationum ha-
bent. Habemusque hujus rei exemplum in veteri testamento Num. 14.
Ubi Balaam p[ro]phet[a] Dei, quamvis vellet, maximèque perceperet po-
pulo Israelitico maledicere, nunquam tamen Deo prohibente potuit:
quod Regi, à quo ad execrandum conductus erat, confessus: Non potero
praterire, inquit, sermonem Domini Dei mei, ut vel boni quid vel mali
proferam ex corde meo, etiam si dederit Balac plenam domum suam argen-
ti, & auri, sed quidquid Dominus dixerit hoc loquar. Et in eodem anti-
quo testamento summo sacerdoti Oraculum non canebat, nisi sacris in-
duto & Pontificem agenti. Idem dicas de Romano Pontifice.

At, inquires, hoc perpetuum miraculum est, non posse hominem er-
are,

rare, cùm hoc sit maximè humanum: multóque magis Papam hæreticum non posse hæresin docere, cùm tamen ex abundantia cordis os loquatur, nec possit arbor mala fructus bonos facere.

Respondetur. Si per miraculum rem intelligas viribus naturæ superiorum, verum dicis: sed hoc in Ecclesia non est novum, immo quotidianum, & penè momentaneum, ut appareat in justificatione peccatorum, administratione sacramentorum, sacrificio incruento aliisque mille: nec enim Ecclesiam natura, sed gratia munit, conservatque; nec Deo difficultius est supra, quām juxta naturam agere, cùm omnia voluntate & nutu agat, ipsique naturæ nihil magis sit innatum, & proprium, quām volenti Deo obedire, adeò ut quidquid, agente Deo, naturæ supra naturam accedit, sit illi magis consentaneum, quam ipsa natura, quam Philosophi vocant potentiam obedientialem.

II. *Non obstat 2. Frustra esse Concilia, si Papa sine illis errare non potest.*

Relp. Certum esse, & negari à nemine posse, etiam sine Conciliis definitiores fidei posse, & trecentis ac amplius annis definitas suisse; nec propterea tamen frustra Concilia sunt: nam & sine thema possum & sine equis iter facere, nec ista tamen frustra sunt. Roma teste Plinio l. 29. c. 1. sexcentis annis medicis caruit, multoque pluribus sine magnete ve la fecit: non ideo tamen nullus est magnetis & medicorum usus. Pontifex ergo Concilium vocat, non quia sine Concilio errori subjacet; sed quia in Conciliis, quō plura sunt capita, eō plures sunt oculi linguaeque, quæ vident & consulunt, tantoque citius veritas reperitur, quanto à pluribus queritur. In Concilio omnium nationum Episcopi sunt, qui singularum varias necessitates, conditiones, mores exponunt, & accommodata singulis remedia suadent, dissentanea refutant. Et cùm non sufficiat leges ferre, nisi etiam latæ executioni dentur; in Conciliis de modo exequendi agitur, nec ullus exceptioni locus datur, ubi omnes audit, communiqué omnium consilio leges decretæ; cessantque querelæ subditorum, ubi non unius tantum, sed omnium voto obstrictos se vident, pudetque omnes accusare. Hæc sunt bona Conciliarum, quæ tamen cum multis magnisq; periculis aliquando viciantur, Pontificis arbitrio sedet, quando cum illis, quando sine illis agere velit: illi enim creditæ sunt oves, illi traditæ claves, in illo fundata Ecclesia, nullâ Concilij mentione.

III. *Non obstat* 3. Assistentiam Spiritus S. Romano Pontifici sub ea conditione promissam, ut is in rebus fidei declarandis sufficientem adhibeat diligentiam, humanoque procedat modo, prout in rebus arduis, summiisque momenti homines solent, nec enim si dormienti aut intemperiis agitato constitutio aliqua excideret, ea continuo pro fidei dogmate recipienda esset: ex quo duplex argumentum ducitur. Primum: quia ut huic necessariæ diligentia satisfiat, videtur Concilium necessarium omnino esse, hujus enim indictione est supremus humanæ diligentia gradus, cum major adhiberi non possit. Secundum: quia nobis constare non potest, an Pontifex sufficientem, & inveniendæ veritati necessariam diligentiam adhibuerit; ergo etiam constare non potest de veritate ab eo factæ decisionis, quæ illi, ut diximus, diligentia alligata est.

Resp. Verum esse, oportere Romanum Pontificem adhibitis pro negotii qualitate Doctorum consiliis, matureque expensâ veritatem fidei decernere, nec Deum præcipitatis in re tanta, & temerariis sententiis radium suum accommodare: sed negamus ad has humanæ industriae partes explendas necessaria esse Concilia; si enim necessaria, cur in Primitiva Ecclesia, tot heresibus agitata cessatum à Conciliis est? immo, ut sæpè diximus, impedimento hæc potius sunt, ubi lenta remedia morbus non admittit; quod maximè in heresi extinguenda verum est, quæ, nisi favillam opprimas, in incendium erumpit. Quod si casum aliquem ponas, in quo sit opus Concilio, Deus, qui nunquam Ecclesie in necessariis deest, neque hic deerit: neque tunc tamen Pontificis sententia plurium suffragiis alligata erit, sed illi parti, quam æquiorem crediderit, quamvis minori: nec enim ad prudentiam, humanamq; industriam pertinet pluribus semper adhærere, sed melioribus; quod optimè Historicus animadvertis, ubi *l. i. decade 3.* cum recitasset Hannonis contra Hannibalem perorantis sententiam, hæc subjungit: *Pauci ac ferme optimus quisque Hannoni assentiebantur: sed in plerumque fit, major pars melior rem vicit.*

At unde constabit diligentiam à Pontifice præstitam, qualem causa requirit, cum hoc sit facti, & à Pontifice errari possit?

Respondemus: Concilio idem opponi posse, nam & hoc in facto errare potest. Sunt ergo, ut infra dicetur, aliqua, quæ ad factum quidem spectant; sed quia à Deo revelata sunt, aut saltem cum revelatis connecta, & ad publicum Ecclesiæ bonum spectant, in iis & quæ ac in Juris questioni-

stionibus nec Pontifex, nec Ecclesia errare, aut deficere possunt, Deo enim curæ est, ne desint fini à se præfixo media fini accommodata. Cùm ergo voluerit Deus sententias fidei à Pontifice latas, ratas haberi, fixasque, nec errore aliquo corruptas; ipse etiam curabit, ne sint temerariae, cæcoque impetu, & absque consilio profusa: quemadmodum nodum, quia Deus Abraham filium promiserat, & ex filio perpetuam successionem, ipsu[m]que Messiam; ad eundem spectavit Deum, ut a sterilis filius nascetur, nec ante tempus, quamvis occidi jussus, quamvis jam gladio subjicitus, vitam viniret: quod pulchram S. Paulus ad Romanos 4. exprimens: *Et non infirmatus est, inquit, Abraham fide, nec considerauit corpus suum emortuum, cùm iam ferè centum esset annorum. Et emortuam vulvam Saræ. In reprobatione etiam Deus non habuit diffiditiam, sed confortatus est fide dans gloriam Deo, plenissime sciens, quia quacunque promisi, potens est & facere.*

IV. Nec obstat 4. Sanctum Cyprianum Episcopum & Martyrem in Synodo 80. Episcoporum, contra expressam Stephani Papæ definitionem, statuisse hæreticos rebaptizandos esse, immo in eundem Stephanum acriter invectum, ut patet ex illius epist. ad Pompejum. Sensit ergo B. Cyprianus aliisque Episcopi, non esse, quæ à Papa definiuntur, omnino certa, posséque integrâ fide improbari; alioquin hæreticus est Cyprianus, & in hæresi mortuus, quem tamen Ecclesia semper ut Sanctum venerata est.

Resp. Antequam huic argumento satisfiat, repetenda est dissensionum origo, quæ Cyprianum in Stephanum Papam concitârunt majori, quam Sanctum & Martyrem decuit, agitationes, adeò ingentis animi viris facilis est ferrum & pœnas, quam affictus & animum vincere. Res sic habuit. Novatus in Africa Episcopus, gravium illic flagitorum postulatus, Romam concesserat, homo turbidissimi ingenii, serendisque contentionibus unicénatus, ac ut verbis Cypriani utamur: *Curiosus ut proderet, adulator ut falteret, nunquam fidelis, ut diligenter, fax & ignis ad conflanda seditionis incendia, turbo & tempestas ad creanda fides naufragia.* Hic ubi Romæ fuit, excitato schismate, Clerique Romano in partes a factiones diviso, Cornelio legitimo Pontifici Novatianum Sacerdotem Romanum opponit, eumque à paucis Episcopis Pontificem renuntiari curat. Additæ schismati hæreses: negabat enim lapsos, quamvis facti pœniteret, recipi debere; hinc se suosque Catharos, hoc est, mundos

appellabat, gestabatque candidam vestem, sanctitatis insigne, quod nollet peccantibus misceri; eos qui à Catholicis Baptismum accepissent, tingi iterum jubebat, quod immundos, indignosque diceret, ut suis jugerentur. Hinc Cypriani errores, litesque cum Stephano: negabat Baptismum ab hereticis collatum, validum esse, sed necessariò repetendum; hereticos enim extra Ecclesiam esse; extra Ecclesiam vero nec fidem, nec Sacraenta, quae fidei sigilla sunt, dari. Ad hunc errorem munendum tres in Africa Synodi celebratae, in quibus Cypriani potissimum auctoritate damnatus hereticorum Baptismus repetique jussus. Ex Synodo Carthaginensi, ad quam 87. Episcopi convenerant, datæ ad Stephanum Papam litteræ, quibus quæ statuta essent, docebatur. Improbavit Stephanus perperam facta, resciditque in hac verba: *Si quis a quacunque heresi ad Ecclesiam venerit, nihil innovetur: nisi, quod traditum est, ut manus illi imponatur in pœnitentiam.* Exaruit ad hoc responsum Cyprianus, suamque & tot Conciliorum sententiam damnari haud ferens, calamus in Stephanum armavit, scripsitque ad Pompejum Sabratensem Episcopum epistolam illam 74. flammæ, myrræque plenam, & in qua Martyris oblitus hominem se ostendit. Ceterum quamvis hunc de rebaptizandis hereticis ante Cyprianum Tertullianus & Montanistæ errorem invexerint, multæque ante turbas Africanas in Oriente Synodi confirmarint, præsertim Iconiensis, cui Firmilianus Cesareæ Episcopus interfuit epist. 75. Cypriani. Euseb. I. 71. 4. & 6. Philag. de heres. c. 50. Præpotuit tamen veritas, omnesque Catholici Stephano Pontifici adhaeserunt, & Cypriani sententia damnata est in Concilio Arelatensi I. can. 8. & Nicano c. 19. & testatur S. Hieronymus I. contra Luciferianos: *Synodus, inquiens, Nicana omnes hereticos suscepit, exceptis Pauli Samosateni discipulis.* Isto illi ipsi, qui maximè pro hac Cypriani sententia pugnaverant, primi postea impugnârunt, Stephani definitionem amplexi. S. Augustinus epist. 48. ad Vincentium existimat Cypriani ipsum sententiam mutasse; idem habet I. 2. contra Donatistas c. 4. Illud quoque certum est, sic inter Cyprianum & Stephanum pugnatum esse, ut neuter heresis alterum damnaret: de Cypriano constat ex epistola synodica ad Stephanum Papam. S. Hieronymo adversus Luciferianos. S. Cypriano epist. 29. & ep. 72. S. Augustino I. 2. contra Donatistas c. ult. & I. 3. c. 3. 4. 5. 6. & I. 7. c. 1. & contra Cresconium I. 3. c. 1. & 2. De Stephanove-ro, non fuisse ab hoc questionem definitam, nec Cypriani errorem heresi no-

refi notatum scribit S. Augustinus l. 5. contra Donatum c. 25. Eusebius l. 7. c. 4. ubi notat Stephanum excommunicationem tantum Baptisma repetentibus minatum esse: patetque ex ipsa Stephani ad Carthaginense Concilium sententia, quam refert Eusebius loco cit. Cyprianus epist. 74. ubi nihil aliud Stephanus dicit, quam: *Nihil ab antiquis traditionibus quo ad hæreticos, qui respicunt, redeuntq; ad Ecclesiam, innovandum esse.* Eusebius l. 7. c. 3. Stephanus, inquit, nihil novi aut alieni à traditione ex temporibus Apostolorum derivata molendum ratus, hac dere vehementer commotus fuit.

Hisce prænotatis facile ad argumentum respondetur: Cyprianum videlicet quantumvis contra Stephanum sentiret, non tamen hæreticum fuisse, idque multis rationibus. Primo: Quia Stephanus nihil adhuc è cathedra definierat, nec opinionem suam ad fidem pertinere dixerat, contrariam verò ad hæresin; non potuit ergo Cyprianus hæreticus esse, quæstione neccum decisâ, nec ad fidem spectante. Secundo: Quia nondum tot Conciliorum, Patrum, canonumque decreta emerferant, nec Ecclesiæ præxis adhuc satis ostenderat, extra Concilium errare Papam non posse; immo neque hoc temporis, qui contrarium afferunt, hæresis petimus.

Errasse tamen Cyprianum, cum Stephano Pontifici se opposuit, nec culpâ caruisse ipse rei eventus Ecclesiæq; auctoritas ostendit, quæ postea Cypriani sententiam pro hæresi habuit: & Patres Cyprianum quantumvis sanctum & Martyrem intemperantiæ damnarunt: & S. Augustinus l. 1. contra Donatistas c. 18. dicit: *Hanc culpam Cypriani, falce Martirij fuisse purgatam.* Et c. 19. *Fuisse hōb peccatum, quasi nāvum in candore sanctæ illius animæ, quam ubera charitatis tegebant.*

Hoc ergo Cypriani exemplum non tantum sententiam nostram non impugnat, sed illam vehementer confirmat. Si enim Cyprianus & sanctus & Martyr, doctrinâque præcipuus, & cuius sententiæ quam plurima Concilia, ac ferè omnes in Africa & Oriente Episcopi subscripterant, & sanctitate florentissimi, ubi tamen à Pontificis Romani sententia deflexit, & ipse adeò graviter erravit, & secum totum illud sanctorum Doctorumq; agmen in errorem traxit; cui se periculo exponunt, qui nec doctrinâ, nec sanctitate Cypriani sunt, nec habent pro se tot Conciliorum Patrumq; suffragia, nec tamen Pontificum sententias observant, sed eo prætextu, quod errores admittant, neglectui habent? illi qui usque

usque ad cœlos ascenderant, qui nidum suum inter stellas collocarant, quique Ecclesiarum columnæ, & turres Religionis videbantur, illi, inquam, a Petro avulsi ceciderunt: tu canna & vitrum illis cadentibus stationem tibi promittis? Audiens est Vincentius Lyrinensis, qui quām multis validisque rationibus suam causam Cyprianus munierit, ostendit: ut tanto clarius evadat, Pontificis sententias omni ratione majores esse, ut pote quæ Deum à se habeant, nec ullam esse causam tam speciosè instrutam, quæ illius auctoritatē non cedat. Sic ergo Lyrinensis contra hæreses cap. 9, scribit: *Intelligebat ergo vir sanctus & prudens (Stephanus Papa) nihil aliud ratione pietatis admittere, nisi ut omnia, quā fide à Patribus suscepta forent, eadem fide filii consignarentur; nosque Religionem, non qua vellemus, ducere, sed potius qua illa duceret, sequi oportere: id ē esse proprium Christianae modestie & gravitatis, non sua posteris tradire, sed a majoribus acceptas servare.* *Quis ergo tunc universi negotij exuni? quis utique nisi usitatus & solitus? retenta est scilicet antiquitas, & explosa novitas. Sed forte tunc ipsi novitiae ad inventionem patrocinia defuerunt. Immo vero tanta vis ingenii adfuit, tanta eloquentia & fluminis, tantus assertorum numerus, tanta verisimilitudo, tanta divina legis Oracula, sed plano novo ac malo more intellecta; ut mihi illa conspiratio nullo modo destrui posse videatur, nisi solam tanti molimini causam: ipsa illa suscepit, ipsa defensa, ipsa laudata novitatis professio destituisse.* Postremo ipsius Africani Concilii, sive decreti quæ vires? donante Deo, nulla: sed universa tanquam sonnia, tanquam fabula, tanquam superflua, abolita, antiquata, calcata sunt.

V. Non obstat. Posse Pontifices in alia peccata incidere, Simonia, avaritia, superbia, &c, cur non in hæresin, cum hæc plerumque ex illis consequatur?

Resp. Aliud esse Pontificem in hæresin cadere, aliud posse hæresin ex cathedra docere; hoc negamus: cur hoc? quia Christus non pro Petri humilitate, charitate, justitia &c. rogavit, sed pro fide ne deficeret: in hac Ecclesiam Christus fundavit, huic Patres, Concilia, Ecclesiarum testimonia ferunt; nec à Christo dictum est: quæ faciunt fratre; oportet ergo doctrinam incorruptam esse, non exempla: hæc fieri possunt non illa.

VI. Non obstat. Petrum bis, & gravissime errasse, nam Matth. 26. Christum negavit: & alii Galatas 2. cogit gentes iudaizire, unde

de à B. Paulo graviter reprehensus est. Si ergo Petrus errare potuit, quanto magis Papa Petri successor?

Resp. Petrum ore, non corde Christum negasse, cùm nondum Pontifex esset; Primatus enim Ecclesiae promissus illi est *Matthai 16.* ante passionem, sed collatus post Resurrectionem *Ioann. ult.* fuit ergo hic error vel potius culpa Petri pescatoris, non Petri Pontificis. Deinde non docuit Petrus definitivè Christum negandum esse, sic que non fuit ille error *doctrina*, aut *cathedra*, sed *Personæ*, de quo non agimus. Alium errorem quod sp. &c. iterum assumitur factum incertum, ex quo nihil certi deduci potest: Græci enim Patres plerique & cum iis Hieronymus epist. 89. ad Augustinum, nullum in Petro errorem agnoscunt, sed omnia ex composito simulatèque, non seriò inter Petrum Paulumque acta fuisse dicunt, ut Judæos juxta & Gentiles lucrarentur, ita Origenes, Didymus, Apollinaris, Eusebius, Theodorus Heracleotes, Chrysostomus, Theodoreus, Theophylactus, Oecumenicus, ad Galat. 2. Cassianus collat. 17. & Hieronymus epist. 89. ad Augustin. Hi omnes Petrum excusant, eumque similitè tantum à Paulo redargutum dicunt, alioquin multo majori Paulum reprehensione dignum fore, qui legales ceremonias multo sèpius & accuratiùs, quàm ipse Petrus adhibuit, n. m. ut à Judæis gratiam iniret, Timotheum patre gentili natum circumcidit *Actor.* 16. caput Nazariorum more totondit *Act. 18.* Hierosolymis cum Judæis se purificavit *Actor.* 21. denique Judæus Judæis factus est 1. ad Corinth. Cur ergo in Petro tam indignè tulit, damnavitque quæ toties usurpavit ipse? & cùm oporteat aut Petrum in culpam aut Paulum vocari, Petrum si justè corruptus est, Paulum si injustè corripuit, immo & fecerat, quæ in alio fuggillaverat; cur non potius, inquit, Petrum Apostolorum Principem absolvamus? immo utrumque, quod fiet, si nec Petrum errasse dicamus, nec Paulum seriò objurgâsse, sed in speciem, & simulatò. Hæc Græcorum Patrum & Hieronymi sententia est. Latini errasse Petrum fatentur non quidem in ipsa rei substantia (nec enim usum Legalium necessarium credebat, cùm ipse in Concilio Hierosolymitano contrarium paullo antè definivisset *Actor.* 15.) sed in modo, & loci ac temporum circumstantiis: sic enim à Gentilibus secesserat, eorum cibis abstinebat, totusque cum Judæis erat, ut auctoritate, exemplique, quod prolege fideles habebant, quàm plurimos in errorem inscius induceret, quòd crederent necessariò à Gentilium cibis,

Yyy quos

quos tanto studio Petrus vitabat, abstinendum esse, ut etiamque Judicis ritibus, quos ille tam accurate palamque colebat, magno Gentilium malo, qui propterea Christianos aversabantur, & isti in Iudaicos ritus, tamquam necessarios se induerant: hanc ob causam Petrum severè à Paulo objurgatum; Deo id agente, ut in uno libertas Christiana, in altero modestia & patientia micaret, exemplo subdit, Prælatisque profutaro, ut egregie notant S. Augustinus lib. 2. de Bapt. contra Donatist. cap. 2. & S. Cyprianus epist. 71. ad Quint.

Sed quidquid de hoc sit, certum est Petrum non doctrinâ errasse, sed ad summum exemplo: nec enim docuit, aut decreto aliquo sancivit iudaizandum esse; sed exemplo quod omnes venerabantur, quam plurimis occasionem errandi dabat: hoc reprehendit quidem Paulus, sed extra disputationem est. (a) Cur ergo dicit Paulus; cogebat iudaizare? Respondeat Tertull. lib. de Prescript. & cum eo omnes Patres, non iussu, sed exemplo Petrum coegerisse: cui tantum omnes tribuebant, ut pro imperio haberent, quidquid ille ageret: & hoc ipsum S. Paulus expressit ad Galat. 2. ubi Petrum non docuisse aut præcepisse dicit; sed à gentilibus se subduxisse, simulasse, ritu Iudaico vixisse, &c. alioquin doctrinam quod attinet, certum est sanctum Petrum Legalium observationem non habuisse pro necessaria Act. 15. & ad Galat. 2. Ergo ut verbo omnia dicamus, simulavit Petrus, non docuit; si ergo erravit, non doctrinæ fuit error, sed facti, de quo non contendimus.

VII. Non obstat 7. Zephyrinum Papam ementitis à Montano valenciis ac miraculis captum eisdem communicasse, ut testatur Tertullianus l. adversus Prætextat. c. 11.

Resp. Tertullianum Montanistam fuisse, tantumque illi credendum, quantum Calvinista aut Lutherano sacras litteras pro se affrentibus, maximè cum præter Tertullianum, nemo aliud id scribat. Deinde ex Eusebio l. 5. cap. 3. sciendum est, Montanistas prius quam eam hæresin incidissent, viros fuisse insigni pietate, miraculis & vaticiniis claros, adeò ut etiam in hæresin prolapsi multis sanctisque viris impulerint, teste eodem Eusebio: præferebant insignem pietatem, martyria, jejunia, & quidquid apud Catholicos in pretio erat, sanctissime colebant:

(a) V. epistolas Hieronymi & Augustini §. 9. 19. & 89.

colebant: quâ pietatis larvâ, Tertulliano, omnium ea tempestate præstantissimo illusum, ut quos fuerat acerrimè insectatus in *l. de prescript. c. 15.* eos postea, & defenderit & coluerit, specie videlicet miraculorum & severitatis, quam profitebantur, deceptus. Quid ergo mirum, si eodem pietatis apparatu, obtentuque Religionis Catholicæ Zephyrinum circumvenerint? qui tamen à Praxeatei fabulam edocitus, communione pacemque, quam illis paraverat, continuò abrupit. Nihil ergo, quod fidei adversaretur, docuit Zephyrinus, sed mendacio deceptus est, at nos Pontificem decipi ab aliquo posse, haud negamus. (a)

VIII. Non obstat 8. Liberium Papam Arianæ hæresi subscripsisse teste Athanasio in epistola ad solitariam vitam agentes, & Hieronymo in Chronico & in catalogo, aliisq.

Resp. Totam Liberij culpam hanc fuisse; quod tandem poenarum exiliisque, & spe repetendæ summæ dignitatis vixit; primæ fidei formulæ, quam Sirmij ediderant Ariani, subscripsit, & in damnationem Athanasij consenserit. Hoc solum & totum est Liberij crimen, nec ab ullo scriptorum aliud memoriarum proditum est. In eodem Sirmiensi Concilio secunda formula Confessionis concepta est impia omnino & blasphemiarum plena, in qua Dei Filius, nec ejusdem substantiæ cum Patre, nec similis esse dicitur: Huic secundæ Hosius Episcopus Cordubensis extremâ jam senectute, vi & tormentis adactus subscripsit. Hujus secundæ formulæ adeò ipsos Arianos puduit, ut in Concilio Ancyrano tertiam ediderint, Catholicæ omnino simillimam, nisi quod vocem *Consubstantialis* omitterent, hanc Constantius amplexus est, & secundam suppressam, expunctamque voluit, proposito iis, qui eam occultarent, suppicio. Ita scribunt S. Athanas. de *Synod. Socrat. l. 2. c. 29.* S. Hilarius *l. de Synod. Epiphanius hæresi 73.* Forma igitur Professionis, cui Liberius subscripsit, licet vocem *Consubstantialis* silentio premeret, fuit planè Catholicæ, in qua Photini hæreses damnabantur, in qua Filius ejusdem cum Patre substantiæ dicebatur, quam ipse S. Hilarius exponens, Catholicam esse fatetur, idemque asserit Vigilius Episcopus Trident. *adversus Eutychen l. 5.* Et Liberius in litteris,

Yyy 2

quas

(a) Philastr, de hæres. c. 50. & Epiphanium hæresi 48.

quas ad Orientis Episcopos dedit, se idē cum Ursacio & Valente communicasse dicit, quod eorum fidem agnoscet Catholicam, alienaque ab Ariana perfidia. Immo Augustinus tantus Arianorum hostis, adversus Pascentium Arianum agens, se illius fidei subscriptum spondet, si nihil aliud Catholicæ veritati contrarium inveniat, quam quod vocem *Consubstantialis* omittat epist. 174. & tamen hanc solam Liberius omitti passus est; cur ergo silentio, & quidem pœnis expresso, unius vocis hæreticus? præsertim cum non prius Sirmio Liberius excederet, quam Ariana hæresi, illisque qui negarent filium substantiam, reliisque omnibus Patri similem esse, damnatis, teste Sozom. l. 4. c. 14. Cum ergo formula Sirmiensis cui subscriptus Liberius, nullam hæresin professa fuerit, & Episcopi, cum quibus communicavit, id ipsum credere dicentes, quod in illa continebatur, ex quo tandem capite Liberium hæresis accusas? de cuius in vera fide constantia contemptuque munera sibi Constantio Augusto oblatorum vide Theodoret. l. 2. c. 22.

Cur ergo, inquires, S. Hieronymus aliquique Liberium hæretica privatitudini subscripsisse dicunt? Quia Athanasij condemnationi assensus est, cuius causa adeò cum fide conjuncta fuit, ut idem videretur Athanasiū condemnare, quod fidem prodere: Quia vocem *Consubstantialis*, quæ tessera Catholicorum erat, omitti passus est: Quia cum Ariani communicavit; ubi quidem multum graviterque à Liberio peccatum est, sed extra naufragium fidei: quemadmodum non idē Lutheranus est, qui cum Lutheranis communicat: sed hinc quoque maculam Liberius extersit, cum rescissis damnatisque Ariminensis Concilii Actis, fedeliter pulsus ærumnisque confessus, in sepulchris delituit, multisque propterea encomiis a SS. Patribus laudatus est. V. Sozomen, lib. 4. cap. 10.

Denique etiamsi concederimus formulam, cui Liberius subscriptis, hæreticam fuisse, quid denique contra sententiam nostram sequitur? aliud enim est hæresi subscribere, aliud hæresin docere: & quemadmodum Petrus cum Christum negavit, aut Marcellinus cum Idolis thus incendit, non propterea ex cathedra sententiam tulit, deciditque Christum negandum, Idolis adolendum esse; ita nec Liberius. Nec nos Pontifices metu vinciri posse, ut hæresi subscriptibat, & cum hæreticis

communicet, negamus: sed non posse hæresin è cathedra Ecclesiam docere, & fidelibus errorem, pro veritate, credendum imponere: hoc nec Liberium, nec nullum Pontificem fecisse, facturumque contendimus. De aliis verò Pontificum erroribus nobis nec quæstio, nec cura est. (a)

IX. Non obstat 9. Felicem II. operâ Arianorum, Liberio in exilium pulso, sufficuum esse, quem S. Hieronymus Episcopum Arianum fuisse dicit in Catalogo scriptorum in Acatio.

R. esp. Felicem, antequam Pontifex Romanus eligeretur, libere quidem cum Arianis communicasse, nunquam tamen Arianum fuisse, ut expressè testantur Ruffinus l. 10. hist. c. 22. Theodoreetus l. 2. cap. 17. Sozomenus l. 4. c. 10. Immo ubi cathedram Petri conscendit, in alium drepentem mutatus, & societatem cum Arianis abrupit, & Constantium Augustum, quid Baptismum ab Arianis accepisset, sacris interdixit, capite ut aliqui dicunt propter rea truncatus, aut alias pro fide catholica ærumnis confessus; nam sanctum & Martyrem obiisse certum est. (b)

X. Non obstat 10. Gelasium I. Papam, in libro contra Eutychen, docuisse in Sacramento Eucharistiae una cum carne Christi etiam substantiam Panis post Consecrationem durare, quæ est manifesta Lutheri hæresis: ex quo errore argumentum contra Eutychen deducit, ut quemadmodum post consecrationem utraque substantia inconfusa perseverat, ita post Incarnationem: verba Gelasij sunt: *Certè Sacra menta, quæ sumimus, corporis & sanguinis Christi, divinare est, propter quod & per eadem divinae efficiuntur consortes naturæ, & tamen esse non desinit substantia seu natura panis & vini, &c.* Et ne quis dicat hunc librum Gelasii Papæ non esse; sciendum est S. Fulgentium Gelasii coævum, hunc ipsum librum Gelasio adscribere, & multa ex illo citare respons. 2. ad Ferrand. Diacon. & patet ex illis verbis, quæ in eodem libro habentur: *Cum sedem Apostolicam dilectio vestra unanimiter teneat, constanter pradicet, sapienterq; defendat, &c.* Quæ verba auctorem fuisse Romanum Pontificem aperte ostendunt. Si potuit ergo Gelasius errare, poterunt & alii Pontifices, nec enim major est unius,

Y y 3

quām

(a) V. Baron, ad annum CCCLVII, num. 9. ubi suppositi titia Hilarii scripta refellit.

(b) V. Bellarmi de Romano Pontifice l. 4. c. 9. Baron, ad annum CCCLVII. Azot. p. 2. l. 4. c. 17. Damasum in vita Felicis, S. Gregor, 1, in Antiphonario & sacramentario.

quām alterius ratio, cūm omnes & quē sint Christi Vicarij, omnes Petri Successores, omnesque in eadem cathedra sedeant.

Resp. Hic iterum ex incertis argumentum deduci: est enim incertissimum, Gelasium Papam illius libri auctorem esse; immo videtur certum non esse, ut gravissimi Scriptores tradunt, & nos demonstrabimus, ut planè causæ suæ infirmitatem ostendant, cui sustinendæ tam infirmæ, & incerta præsidia adhibentur. Sed Gelasium Papam illius libri auctorem non esse his rationibus probamus.

Primo. Quia liber, quem contra Nestorium & Eutychen Gelasius Papa composuit, Gennadio de scriptor. Ecclesiast. & Anastasio Bibliothecario testibus, fuit grande volumen, & in quinque libros distinctum, hic autem, de quo agimus, libellus tantum est, & cujus, qui de Gelasij lucubrationibus scripsere, Gennadius vid. Anastasius, Trihemius &c. nullam mentionem faciunt.

Secundo. Auctor libelli de duabus naturis in ipso exordio altercationem de duabus naturis novam, recentemque & nuper natam esse dicit, ejusque initii extinguebis se illam scriptionem suscepisti: at verò quot tempore Gelasius sedebat, Eutychiana hæresis non tantum novare censque non fuit, sed planè decrepita, immo extincta & funerata, & quam multa Concilia jam dudum damna verant, Constantinopolitanum vid. sub Flaviano Patriarcha anno CXLVIII. & aliud Constantinopolitanum, cui Leonis Papæ Legati adfuerunt anno CDL. & Concilium Chalcedonense Oecumenicum anno CDLI. post quod à Marciano & Leone Imperatoribus exterminati sunt Eutychiani anno CDLII. & CDLX. Quomodo igitur Gelasij Pontificis tempore, qui anno CDXCII. electus est, potuit hæresis tot jam retrò annis nata, damnata, extincta, nova esse, recensque?

Tertio. Hic auctor professus se omnium ferè antiquorum Patrum sententias de incarnatione Domini collecturum, ex Latinis duos tantum citat Damasum & Ambrosium, reliquos Græcos omnes, quod argumento est Græcum fuisse, immo Concilij Chalcedonensis, & Leonis Papæ nullam planè mentionem facit, à quibus tamen maximè hæresis Eutychiana conclamata, explosaque est, ut omnino credibile sit hoc opusculum à Gelasio Papâ, & post Chalcedonense Concilium conscriptum esse, cūm sola hujus Concilij auctoritas mille Patribus par esset, sufficeret.

sufficiissetque adversariis revincendis: cur ergo omissum, quod præ omnibus erat? & omissum à Gelasio Papa tantæ eruditio[n]is tantique ingenij viro; qui[que] Concilij Chalcedonensis auctoritate libenter utitur, ut patet ex ep. ad Fanum data, tanto libentius tunc usurpus, cùm argumentum, quod præ manibus erat, id unicè posceret, & victoria ex eo penderet.

Quarto. Inter alios orthodoxos Patres Eusebium Pamphili Cæsariensem Episcopum citat, eumque Gregorio Nazianzeno anteponit, hominem videlicet non tantum non sanctum, nec Patribus annumerandum, sed omnino impium, qui in Diocletiani persecutione defecit, qui sanctos Athanasium & Eustachium Catholicæ Religionis Duces acerrimè infectatus est, qui hæresin Arianam facis instar ubique accedit, in eademque vitam finivit; cujus memoria execrationi semper & luctui Catholicis fuit, quem etiam ejusque opera tanquam peste Ariana infecta septima Generalis Synodus *Act. 5. & 6.* proscripta voluit, cuiusque historiam eodem veneno tinctam Gelasius Papa inter Apocrypha rejicit; hunc, inquam, hominem toties mendacem perfidumque à Gelasio inter Patres, inter sanctos referri? ejusque testimonio, velut orthodoxi Eutychianos revinci?

Quinto. Testatur Cassiodorus solitos fuisse hæreticos, & Pelagianos præsertim suis, quæ in lucem emittebant, operibus Gelasij Pontificis nomen præfigere, ut (verba sunt Cassiodori *l. de divin. Lett. cap. 8.*) res virtuosas gloriose nominis auctoritate defendenter. Nihil ergo novi, si Gelasio Pontifici sint adscripta, quæ ad alium Gelasium spectant, nominis insuper similitudine, fraudem, aut errorem juvante, ut jam dicemus.

Sexto. Itaque Cardinalis Baronius accuratæ eruditio[n]e obseruat, auctorem hujus libelli de duabus naturis contra Eutychen & Nestorium, Gelasium illum esse, cujus in Bibliotheca Photius meminit, qui[que] Acta Synodi Nicænae tribus tomis contra Eutychianos complexus est: hic enim scripsit, cùm hæresis Eutychiana sapientis extincta Basilisci Tyranni potentia gliscere iterum incepit: idem exagitatum se ab Eutychianis, & contra eosdem scripsit.

scripsisse dicit. Eusebium Pamphili eximiis encomiis ornat, & inter orthodoxos refert, eumq; Joannes II. P.P. in ep. ad Acacium, aliosque senatores citat, quæ omnia optimè, & velut ad unguem in libelli auctorem quadrant. Videantur de hoc argumento Baronius citat. Bellarminus de Rom. Pont. l. 4. c. 10. Canis de locis Theolog. l. 6. c. ult. ad 9. Spondan. ad annum CDXCVI. Ludovic. Jacob. Biblioth. Pont. le Mire Biblioth. Ecclesiast. pag. 72. & 201. Perronius, Binnius, Sirmundus, aliq.

Quod si verò concederemus hunc ipsum libellum & errorem Gelasij Pontificis esse, non propterea causâ cecidimus. Jam enim premonuimus Papam multa dicere & scribere, ut privatum Doctorem, non ut Pontificem: nec enim libros scribere est actio Pontifici propria, sed cuilibet Doctori concessa & communis, quæque ex omnium sententia errorum admittit, nec quidquid libris suis Pontifices inserunt, ad fideli dogmata pertinere volunt. Immo hæc est distinctio inter Dei & Pontificis Verbum, quod illud in nulla sui parte, nullo tempore, nulloque casu, etiam in re minima mendacium errorémve patiatur: Pontificum doctrina in eo solùm casu certitudinem meretur, nec ullo errore feedari potest, cum Ecclesiam è cathedra docet, hoc est, cum quæstione aliquâ inter Christianos exortâ, Pontifex rebus omnibus mature discussis sententiam pronuntiat, declaratque ad fidem aliquid aut hæresin pertinere, & Christi fidelibus, quid eos credere necessariò oporteat, cum apparatu, & pro Pontificia auctoritate mandat: hæc enim solennis, auctorativa, ad totam ac universalem directa cum mandato declaratio, est actio soli Pontifici propria, in quam, ut docuimus, cadere error non potest, quod de illa circa Eucharistiam doctrina, Gelasio ad scripta dicta non potest.

XI. Non obstat ii. Eundem Gelasium Papam docuisse sacram Eucharistiam sub utraque specie necessariò sumendam esse, nec posse sine sacrilegio species separari, quæ est hæresis Hussitarum & Calvinistarum: habetur hoc Gelasij decretum apud Gratianum in c. comperimus. de Confessat. d. 2. in hæc verba: Comperimus quod quidam sumpiā tantummodo Corporis sacri portione, à Calice sacri cruoris abstineant: qui proculdubio (quoniam nescio quâ superstitione docentur obstringi) aut integra Sacra-menta percipient, aut ab integris arceantur: quia a divisione unius ejusdemq; mysterii sine grandi sacrilegio non potest provenire.

Resp.



Resp. Vel Gelasium loqui de Sacerdotibus, qui non possunt alterâ specie abstinere, & sic Gelasium ipse Gratianus, Glossa, & rubrica illius Canonis explicant. Vel Gelasius loquitur de illis, qui non ex præcepto Ecclesiæ, infirmitate, aliâve simili & necessaria causa abstinebant speciebus vini, sed ex superstitione, ut ibi Gelasius se ipsum explicans dicit. Sciendum enim est inter alias Manichæorum hæreses etiam illam fuisse, quod superstiosum ciborum delectum inducerent, abstinerentque à carnis & vino, quibus non inesse divinam substantiam dicebant, sed à mali principio generata: ob quam causam abstinebant Eucharistiâ sub speciebus vini, sed tamen ne hæresis notarentur, cum aliis Catholicis, Eucharistiâ sub panis speciebus fruebantur, ut testatur ocularius testis serm. 4. de *Quadrag.* S. Leo Papa: Oportet ergo tunc temporis calicis usum Catholicis liberum fuisse, & aliquando eo non uti solitos, si enim utrâque specie Catholicî, & necessariò vescebantur, non tam unius speciei usu latuissent, quâm prodiit essent Manichæi, & tamen S. Leo eâ simulatione latuisse eos dicit. Ergo monito ejusdem Pontificis, qui perpetuò, & anxiè unam tantum speciem frequentabant, dato velut signo pro Manichæis habitu deprehensiique sunt. Sanctus ergo Gelasius in citato Canone non absolutè damnat, qui unâ tantum specie Eucharistiâ sumunt: sed qui ex superstitione & sacrilegio hoc faciebant, quales Manichæi erant, quos à Gelasio Papa detectos, exilioque multatos esse, eorum libris concrematis testatur Anastasius Biblioth. in *Gelasio.*

XII. Non obstat 12. Vigilium Papam hæresin Eutychianam professum esse, & anathema illis dixisse, qui duas in Christo naturas dicebant, ut prolixè scribit Liberatus Archidiaconus Ecclesiæ Carthaginensis in suo Breviario cap. 22. Ubi Epistolam Vigilij ad Theodoram Augustam recitat, & habetur in Tomo 2. Conciliorum.

Resp. Casus Vigilij sic habuit. Theodora Augusta Eutychianam hæresin animo fovebat, dolebatque à Romanis Pontificibus suæ fidei Episcopos, Anthimum præsertim sede ejectos, deportatosque esse. Vigilium ergo Agapeti quondam Diaconum aggreditur, ingentem auri vim, & Pontificatum pollicita, si Chalcedone acta rescinderet, Eutychianam fidem probaret, Anthimum restitueret.

Zzz

stitueret.

stitueret. Omnia à Vigilio promissa, auri cupiditate & ambitione ex-
co. Sylverius in exilium pulsus, subornatā, quod cum Gottis collude-
ret, accusatione. Vigilius Belisarij potentia, viventi adhuc & exulanti
Sylverio suffectus; quo tempore ad Theodoram arcano chirographo
Eutychianam hæresin professus est, monitā tamen Augustā, ut omnia si-
lentio, secretōque tegeret, re enim vulgatā Romanos palam defecturos.
Mortuo posteā inter ærumnas Sylverio, Augusta à Vigilio petere, exsol-
veret fidem occultis litteris obstrictam, recipere tque in gratiam Anthi-
mum Patriarcham. Negavit Vigilius præstari à se posse, quæ temere
promisisset: neminem pacts obligari, quæ turpius servantur, quam rum-
puntur. Excanduit imperatrix, & Vigilium attactu, & si dicere licet,
facto quodam Romanæ cathedræ subito mutatum, quasi fidem Petri
cum mitra induisset, in exilium egit, ubi pœnis, ærumnisque confectus,
Sancti nomen, & encomia à Patribus accepit. (a)

Ex hac Vigiliij historia manifestum est, epistolam quâ hæresim pro-
babat, ab eo scriptam, cum nondum vivente adhuc Sylverio legitimus
Papa esset; nec fuisse illam epistolam definitionem è cathedra, de qua
tantum disputamus, sed occultos furtivisque codicillos, & ab ipso au-
tore silentio tenebrisque damnatos, ac hinc prohibitos, quod omnino
sententia judiciali, & è cathedra prolatæ repugnat.

XIII. Non obstat 13. Honorium I. Pontificem Hæreticum Mono-
theilitam fuisse, cámque hæresin in duabus epistol. ad Sergium docuisse,
quam ob causam inter alios hæreticos numeratur, damnaturque in sexta
generali Synodo Constantinopolitana sub Agathone Papa.

Resp. Honorium Papam quod attinet, nos planè ambiguos ani-
mi esse, quid de illius hæresi dici oporteat. Si enim auctoritatem illo-
rum testimoniis, qui eum hæresi accusant, negari omnino non potest hæ-
reticum fuisse, hoc enim testantur Concilia Oecumenica, sextum, septi-
mum & octavum, & hoc præsertim Act. 7. idque semper Apostoli-
cæ sedis Legatis, qui utique reclamabant, si Honorium innocentem
credidissent. Honorium quoque hæresi postulant Hadrianus II. Papa,
ut habetur in actis 8. synodi generalis act. 7. Leo Papa in litteris ad Con-
stantinum

(a) V S Gregor. M. I 2, epist. 36, ad Episc. Hibern. Paulum Diacon. in vita
Justiniani, &c.

stantinum Augustum, Agatho Papa ad eundem Augustum. Iterum Leo Papa II. epist. 2. ad Episcopos per Hispaniam constitutos: & epist. 5. ad Ervigium Regem Hispanie. Nicephorus Patriarcha Constantinopolit. epist. ad Leonem III. P.P. Tharasius ad summos Sacerdotes Antiochiae, Alexandriae, & sanctae Urbis, Theodorus cum Synodo sua Hierosolymitana, ut habetur in 7. synodo aëtor. 3. Beda de naturarerum cap. 67. His omnibus tanto numero, tanique auctoritate, fidem abrogare velle, eosque aut deceptos dicere, aut mendaces, quid amabò aliud est, quam contra torrentem navigare, omnemque historiam Ecclesiasticam in dubium vocare? si enim tot tantique testes decepti sunt, idem de Sozomeno, Socrate, Nicephoro, Theodoreto, aliisque omnibus dici poterit, qui longè mino is fidei, & auctoritatis sunt, quam illi, qui Honorio Hæresin adscribunt: sublatâ verò historiâ, & consequenter traditione, usque Ecclesiæ, quæ tuarma contra hæreticos satis valida habebis? Malè ergo, ut nobis equidem videtur, Ecclesiæ illi consulunt, qui ut Honorij causam tueantur, historiam, Ecclesiæ inque exarmant. Ergo si testibus agenda res est, Honorius Papa hæreticus fuit.

Si verò causam ipsam rationesque attendas, ob quas hæresis postulatur Honorius, fatendum est innocentem esse, & noxâ liberum. Rem non ex aliorum opinionibus, quæ plerumque partibus addictæ sunt, ideoque fallaces; sed ex ipsa historiâ litterisque Sergii Monothelitæ ad Honorium, & hujus ad Sergium deducemus. Heraclius fusis fugatisque Persis, & intra Tigrim fluvium coercitis, Hierapolim viator intraverat. Illic ab Athanasio Jacobitarum Patriarcha officii causâ invisitur. Hunc ejusque asteclas Imperator benignè monet, depositâ tandem Eutychianâ hæresi, quæ unam tantum in Christo naturam agnoscebat, in gratiam cum Ecclesia redeat, & decretis Chalcedonensis Concilii acquiescat. Athanasius jam hæresin Monothelitarum hauserat, qui ex Eutychianis nati duas in Christo naturas admitebant, sed unam voluntatem, unamque operationem. Ergo ex Imperatore vicissim querit, ecquid ipse de Christo sentiat, duásne in illo voluntates duásque operationes, an unam esse? Heraclius quid ad hanc questionem responderet, dubius, Sergium Constantinopoli Patriarcham, & Cyrum Phasidis Episcopum, per litteras consultit.

Zzz 2

Ab utrō-

Ab utróque (nam Monothelitæ erant) responsum^{is}, unam esse Christi voluntatem, unam operationem: idque odedo ab illis Cæsari persuasum, impressumque est, ut edicto, quod Ecthesin, hoc est, expositionem vocarunt, unam in Christo voluntatem prædicari, credique jussérunt. Sergius coeta Synodo novam hæresin, quanto conatu potuit, muniendam curavit, & Imperatoris edictum, ab Episcopis subscriptum spectante populo, ad fores sanctæ Sophiæ palam affixit. Idem à Cyro Alexandriæ factum. Sophronius sanctitate & doctrinâ tunc celebris, & postea ex Monacho Episcopus Hierosolymitanus, exultanti palam hæresi, & Principis potentiam subnixæ, se ex adverso opponit, excitatisque orthodoxis Monothelitas anathemate ferit, & hæreticos pronuntiat. Sergius Catholicorum, & Sophronij præsertim auctoritatem veritus, Honorio Pontifici scribit, simulatâque quam publicè in Synodo & edicto produxerat hæresi, novas à Sophronio turbas agitari dicit, omnia inter Catholicos discordiis misceri, novis nec necessariis vocalarum disputationibus animos turbari: optimum proinde videri, si nec una in Christo voluntas dicatur, nec duæ, sed hisce vocibus velut facibus discordiarum extinctis, id de Incarnatione dicatur credaturque, quod Patres & Concilium Chalcedonense præsertim definierant.

En tibi historiæ contextum ex ipsa Sergii ad Honorium epistola, quæ recitata est in 6. Synodo, Act. 12. & habetur Tomo 3. Conciliorum Venetæ edition. Jam quid Honorius responderit, videamus. Is ergo duas ad Sergium epistolas dedit; utramque reperies Act. 12. & 13. sexta Synodi Tomo 3. Conciliorum. Earum hæc summa fuit: *Duas esse in Christo naturas, eas discretas, inconfusas, impermixtas, sicq; hereticum esse Eutychetem, qui illas confunderet. Utramq; naturam operari, divinam quo Dei sunt, humanam quo hominis. Aostinendum tamen à vocibus duarum vel unius voluntatum, idq; multis ex rationibus.*

Primo. Quia voces illæ novæ, & hædenius inaudita, & ideo partim effent simplicibus suspectæ, partim offendicula, cùm eas non satis intelligerent.

Secundo. Quia qui unam voluntatem diceret, videri posset, unam quoq; naturam admittere, sicq; hæresin Eutychianam incidere: qui vero duas voluntates, duasq; operationes diceret, suspectus fieret hæresis Nestoriana, quasi ut duas operationes, ita duos operantes, & consequenter duas in Christo personas agnosceret.

Tertio.

Tertio. Questionem de una aut duabus voluntatibus in nulla Synodo, nec à Patribus definitam esse, non ergo ad dogma fidei pertinere.

Quarto. Videri hanc questionem vel ad Grammaticos, vel ad Philosophos pertinere, cur ergo illius causa fideles turbentur?

Quinto. Cum dua in Christo voluntates esse dicuntur, aliquos sic intelligere, quasi duas contraria, pugnantes, discordesq; in Christo voluntates fuerint, ita ut humana nollet, quod vellet divina: id vero falsum & absurdum esse; sed in hoc sensu unam tantum in Christo voluntatem, hoc est, non diversam, neque contrariam dari, cum Christus naturam hominis, non culpam aut repugnantiam naturacum divina voluntate assumpserit. Hec est sententia litterarum Honorii ad Sergium, quibus heres Monothelitarum damnatus est, & quas tanto fidelius nos reddidimus, quod Tomo 2. Conciliorum in actis sextae Synodi extitit Act. 12. & 13. ubi facile videri possunt, & cum iis quæ diximus conferri.

Jam vero in his omnibus, quæ Honorius ad Sergium scribit, non tantum heresin Monothelitarum non adstruit, sed planè destruit; Monothelite enim negabant duas in Christo esse voluntates, sed unam tantum: idque in ecclesis ab Heraclio vulgata expressè continebatur: at Honorius clarissime dicit: non esse dicendam unam voluntatem, vel unam operationem, sed unum operantem; monetque Sergium, ut omitat deinceps unam voluntatem in Christo dicere. Monothelite ideo in Christo unam voluntatem ponebant, ut ex illa inferrent unam naturam, cum natura humana sine voluntate esse non possit, quod S. Maximus in disputatione cum Pyrrho animadvertiscit: at Honorius expressè duas naturas distinctas inconfusas, discretasque agnoscit.

Monothelete nullam propriam & humanam operationem in Christo agnoscebant, sed tantum divinam; dicebant enim, admissis duabus operationibus admittendos esse duos operantes, ut observat S. Thom. 3. p. q. 18. a. 1. & Pyrrhus in dialogo cum S. Maximo fatetur: at Honorius in secunda ad Sergium epistola apertissime duas naturas esse dicit, & singularis naturis propriam operationem tribuit, quamvis ad evitandam ex novis vocibus offenditione nollet duas operationes dici. Verba Honorij sunt: Pro una, quam quidam dicunt, operatione, oportet nos operatorem Christum Dominum in ipsisq; naturis veraciter confiteri: & pro duabus operationib; Zzz 3 ablatio

ablato geminae operationis vocabulo ipsas potius duas naturas in una persona inconfuse, indivisi nobiscum prædicare propria operantes. Quid potuit clarius ab Honorio dici? si enim quælibet natura habet propriam operationem, hoc est, humanam & divinam, ergo sunt duæ operationes; sicut enim unum idemque non potest esse equus & lapis, ita, multoq[ue] minus potest esse divinum & humanum. Ergo perinde est duas naturas cum propriis operationibus (quas Monothelitæ negabant) admittere, quod duas operationes; sed hanc vocem, duas, refugiebat Honorius propter causas suprà allegatas. Quomodo ergo Honorius Monothelita, sinegabat, quod Monothelitæ admittunt, admittebat, quod illi negabant? immo quod maximi momenti est, S. Maximus Abbas & Martyr, quiq[ue] sedente Honorio vivebat, in celebri illa, cum Pyrrho Monothelita, disputatione, quam totum græcè latineque Baronius recitat ad calcem Tom. 8. Annalium, Pyrrho auctoritatem Honorij opponenti, respondet: non negasse Honorium duas in Christo voluntates, humanam videlicet, divinamque; sed negasset tantum duas humanas & contrarias, quales in hominibus reperiuntur, cum spiritus concupiscait adversus carnem, & caro adversus spiritum: dabimus verba Pyrhi Monothelitæ Hæretici Honorium acculantis, & S. Maximi Catholici & Martyris eundem Honorium ab imposta calumnia liberantis: Si ita de Vigilio. Quid de Honorio ad respondendum habes, qui aperte antecessori meo unam voluntatem Domini Nostri JESU Christi esse tradidit? Maximus. Quis fuerit fide & auctoritate dignus epistola hujus interpres, quia eam ex persona Honorij scripsit, adhuc superstes, & qui totum occidentem cum aliis virtutibus, tum dogmatibus fides Christiana illustravit; an si, qui Constantinopoli, que ex corde erant, loquebantur? Pyrrhus. Qui hanc compositum. Max. Is igitur ipse, cum ad divum Constantimum Imperatorem ex persona riursus S. Pape Joannis de hac epistola scriberet, dixit: Unam voluntatem diximus in domino, non divinitatis ejus, & humanitatis, sed humanitatis solius. Cum enim Sergius scripsisset, quod quidam duas voluntates in Christo contrarias dicerent, diximus, Christum non duas voluntates contrarias habuisse, carnis, inquam, & spiritus, sicut nos habemus post peccatum, sed unam tantum, quæ naturaliter humanitatem ejus signabat. Hoc autem ita esse, argumentum evidens est, meminisse membrorum & carnis, quæ quidam de divinitate illa acoipi non permitunt.

Dicit:

Dices: Honorius in duabus illis allegatis epistolis se cùm Pyrrho sentire, ejusdemque doctrinam approbare dicit: ac constat Pyrrhum hæreticum fuisse ducentemque Monothelitarum.

Resp. Honorium in uno capite cum Pyrrho conspirasse: in aliis vero, quæ hæresin continebant, aperte & ex professo dissensisse. Scriperat enim Pyrrhus, sibi pacis componendæ causâ, comprimendisque discordiis, quæ glisebant, necessarium videri, ut nec duæ in Christo voluntates dicerentur, nec una, sed duæ tantum naturæ. Respondit Honorius sibi hoc placere, variasque produxit causas, ob quas de duabus operationibus silendum esset. Quod vero Pyrrhus aliud ad Honorium scribens, aliud docens, duas voluntates expressè negarer, unamque assereret, eundemque errorem in Episcopos disseminaret, adeò Honio non placuit, ut etiam positivè improbareret, ut ex illius epistolis manifestum fecimus.

Ceterum quidquid de causa Honorii Pontificis sit; nihil illum ex cathedra definitissimum est, quod hæresin sapiat, certum est: cùm epistolæ, quas ad Sergium dedit, privatæ fuerint, nihilque decidant, & nec unam voluntatem in Christo, nec duas dici velit: sed duas naturas cum propriis operationibus: quod planè non est decidere, sed rem in suspenso relinquere.

XIV. Non obstat 14. Multos alios SS. Pontificum errores fuisse, ut Gregorij III. qui in epist. ad Bonifacium, quæ habetur Tom. 3. Conciliorum & in c. quod proposuisti 32. q. 7. ob infirmitatem Uxoris Marito aliam ducere permittit. Nicolai I. docentis Baptismum in nomine Christi sine trium personarum expressione valere, c. à quodam de Conservation. d. 4. contra canonem multi. & canonem in Synodo d. ead. Alexandri III. in c. cùm esset de Testamento: aliorumque Pontificum, admittentium posse matrimonium ratum alio matrimonio, sed consummato dirimi in c. licet de sponsa duorum. Innocentij III. in c. per venerabilem: ubi dicit legem Veterem necdum plenè esse abrogatam. Nicolai III. in c. ex ijt de V. S. in 6. ubi docet, Christum perfectam docuisse paupertatem, quæ consistit in abdicatione omnis dominii tam in particuli, quam in communi: quam doctrinam hæreticam esse definit Joannes XXII. extravagante ad conditorem. Et quia quorundam de V. S. Idem

Joannes

Joannes negavit animas Beatorum ante Resurrectionem Deum visuras teste Gerlone serm. de Paschate aliisq;. Cælestini III. in c. quanto de divortiis, ubi testatur Innocentius III. eum sensisse Matrimonium dissolvi altero conjugum in hære sin labente.

Resp. Istos omnes aliosque errores, qui Pontificibus tribuuntur, personales fuisse, privatosque, non vero definitivos & sententiales, ut legentibus pater, & ideo singulis non immoramus, sed lectorem adea, quæ jam dicta sunt remittimus; videri etiam possunt Cajetanus in opusculo de 27. questionibus. Azorius 2. p. l. s. c. 15. Canus l. 6. c. ult. Bellarm. de Romano Pontif. l. 4. Spondanus & Baronius, ubi de singulis Pontificibus agunt. Gonzalez in Decretales, aliisque. Habenda est ergo semper ante oculos ea regula, Pontificis Romani in fidei materia definitio-nes, tunc esse certas, infallibilis, securasque veritatis, & quibus reluctari non liceat, cum videlicet quæstione aliquâ ad sedem Apostolicam delata, & re mature discussâ, causæque meritis examinatis, Pontifex sententiam pronuntiat, eamque non ad unam alteramve, sed ad totam & universalem Ecclesiam dirigit, obligatque fideles, ut ita credant: non quidem ut ipsa Pontificis sententia sit causa & ratio credendi; sed tantum applicatio certa & inerrabilis divinae revelationis, cui fides nostra soli & unicè innititur. Talis enim sententia cum auctoritate & imperio aliquid definiens, totique Ecclesiæ velut dogma proponens, est proprius actus Pontificia potestatis, pertinensque ad solum Pastorem Doctoremque Ecclesiæ universalis: alii vero actus, hoc est, epistolæ, rescripta, responsa ad quæstiones privatorum, aut etiam particularium Ecclesiarum, non sunt actus verè Pontificii, sed cuiuslibet Doctoris, aut Episcopi, quos errare posse omnes confitemur. Certitudo quippe fidei à DEO Pontificibus in Petro promissa, non propter personas, Ecclesiæque pri- yatas concessa est, quæ falli omnes possunt: sed propter Ecclesiam uni- versalem erroris incapacem, ut bene notavit Canus l. s. c. s. q. 4.

XV. Non obstat 15. Multa à summis Pontificibus, & etiam Con- ciliis statui decernique, non tanquam certæ & exploratæ fidei, sed tanquam magis probabilia; non ergo quia sunt definita, ideo sunt certa, sed tantum magis probabilia, v. g. in c. firmiter de summa Trinitate. Con- cilium Lateranense sic loquitur: Firmiter credimus, & simpliciter confite- mur, quod unus est solus verus Deus Creator omnium visibilium & invi- sibilium

sibilium, corporalium & spiritualium, qui simul ab initio temporis a-
trahit, denib[us] condidit creaturam corporalem, & spiritualem, Angelicam videlicet mundanam. At qui non est fidei adversum, Angelos ante
mundum corporeum conditos, aut spiritualis naturae non esse; quam-
quam qui hoc diceret, temerarius nunc esset. S. Thom. i. p. q. 61. art.
3. Sic etiam in Clement. unica de sanctissima Trinitate, ea opinio tan-
quam probabilius eligitur, quæ habet, in Baptismo gratiam & virtu-
tes infundi.

¶. Cùm Pontifices & Concilia aliquid definiunt, adduntque veritatem sic definitam ad fidem pertinere, aut anathema dicunt contrarium sentientibus: aut qui ita, ut definitum est, non credunt, hæreticos pronuntiant: aut volunt ea firmiter à fidelibus credi; cùm ergo Pontifices hoc, similive loquendi modo utuntur, certum est, non tantum, quæ magis probabilia, sed quæ omnino certa & explorata sunt, proponi, cùm fides sit de certò veris, hæresis de certò falsis, omni probabilitate exclusâ, & exempla sunt in *c. damnamus de summa Trinit. c. unico eodem in 6. Clement. unicâ eod.* § 2. Quæ autem in Conciliis, vel Pontificum Decretis adducuntur explicandi tantum causâ, vel ad objecta respondendo, vel rationes aliquas afferendo, vel incidenter solum, & præter causam principalem afferendo; hæc ad fidem non pertinent, sed tantum ad majorem minorémve Pontificum doctrinam, cùm solius Dei sacræque Scripturæ privilegium sit, ne apice quidem in veritatem offendere; Conciliis verò summisque Pontificibus ea tantum certitudo donata est, quæ instruendæ Ecclesiæ necessaria fuit. Si verò summi Pontifices sententiam aliquam, non quidem anathemate feriant, nec hæresis notent, eam tamen doceri exercerîe sub pena excommunicationis prohibeant; ea omnem continuò amittere probabilitatem practicam, hoc est, tutò licitéque exerceri, & sine peccato non poterit, quantumvis hæretica non sit. Exempla habemus in *c. ad abolendum. de heret. c. gaudemus de divortiis.* Et in propositionibus ab *Alexandro VII. & Innocent. X. damnatis.*

XVI. Non obstat 16. Pontificem in quæstionibus facti errare posse, ut communis omnium Doctorum sententia habet; ergo etiam poterit in quæstionibus juris, in fidei decretis, & generalibus præceptis morum. Consequentia probatur, quia multa ad fidem per-

Aaaa continentia

§4 Lib. III. §. IX. Respondeatur ad objecta

tinentia, in facto consistunt, v. g. Sacramentum Matrimonii à Christo institutum esse, Sacra menta esse tantum septem, non plura: characterem in Baptismo impressum esse qualitatem indelebilem, quæque repeti non possit, &c. Immo in omnibus definitionibus, quæ ad fidem, moretque spectant, non aliter summus Pontifex infallibiliter à Deo dirigitur, quām si omnem, aut saltem necessariam diligentiam rei examinanda impendat: nec enim somnianti temeriter agenti Spiritus Sanctus dogmata inspirat: at verò ea diligentia est falsa, multisque erroribus subjecta: quid si enim non satis rem penderit? non doctiores rerumque peritiores ad consilium vocaverit? non audierit quæ in contrarium opponebantur? uni tantum parti aurem, non alteri præbuerit? hæc omnia sunt facti, erroremque admittunt: ergo etiam fidei morumque decreta, quæ ab aliis pendent.

¶. Quæstiones facti esse duplicis generis: alia enim sunt facta, vel immediate à Deo per scripturas & traditiones revelata, vel saltem cum revelatis connexa, qualia sunt Christum in Eucharistia realiter existere, & panem in sacram illius Humanitatem mutari, &c. In hæc error nullus eadit, cùm repugnet, Deum in quacumque re, tam facti quām juris, errore aliquo capi, aut falsum dicere, hoc est, aut ignorantem esse; aut mendacem, quæ duæ sunt falsi origines. Ad eadem facta mediatae revelata pertinet diligentia illa necessaria, quam in rebus fidei decidendis in Romano Pontifice desideramus: cùm enim voluerit Deus Ecclesiam errare non posse, voluit etiam nihil ei deesse, quod vitando errori necessarium est: & ideo Patres sextæ Synodi contra Monothelitas ex eo, quod in Christo duæ essent naturæ, optimè intulerunt, duas esse voluntates, cum voluntas sit potentia cum humana natura necessariò connexa.

In illis verò quæstionibus facti, quæ nec immediate, nec mediatae à Deo revelatae sunt, quæque ex testimonio & informatione hominum pendent, negari non debet, & Concilia & Pontifices errare posse: cùm enim fides divina testimonio & Verbo Dei nittatur, & vox Papæ sit vox hominis non Dei, non potest ille, quæ nec mediatae nec immediate revelata sunt, pro fidei dogmatibus proponere: quæ verò sunt facti, revelata non sunt, & ideo errori obnoxia.

obnoxia. Quod ingenuè ipsi Pontifices confessi sunt, Bonifacius videt. VIII. in c. 1. de constitutionibus, ubi dicit: Romanos Pontifices ignorare, quæ sunt facti: at ignorantia est mater erroris: errare ergo potest, qui ignorat: Et Eugenius IV. qui cum ex certis magnisque causis Concilium Basileense dissolvisset, & ab eo acta, planè irrita declarasset, per Bullam Inscrutabilis anno MCCCCXXXIII. veritatem postea edoctus, per aliam Bullam dudum anno MCCCCXXXIV. quæ prius constituerat, revocat; non quia Concilium dissolvere non poterat, sed quia ex non veris causis, ut postea apparuit, id egerat: extant Bullæ Eugenii in actis Concilii Basileensis seff. 16. & vindendus est Raynaldus ad annum MCCCCXXXIV. n.s. Denique qui Honorium I. hæresi absolvunt, sunt verò quam plurimi, ii etiam negare haud possunt, & in Pontifices & in Concilia errorem cadere, ab utrisque enim hæresis damnatus est, ejusque memoria, tanquam hominis hæretici profligata.

XVII. Non obstat 17. Fide tantum humanâ constare hunc in individuo hominem, v.g. Innocentium XI. esse legitimum verumque Pontificem, ac in terris Christi Vicarium; at fides humana errori subest, fierique potest, non esse legitimum Pontificem; quid si enim invalidè electus? quid si non ritè baptizatus? aut unde nobis constat ritè baptizatum, electumque esse, nisi fide humana, quæ falli potest? Sic Joannes VIII. sic Formosus veri Pontifices credebantur, & tamen eventus docuit, illum fœminam fuisse, istum non verum sed imaginatum Papam, & cuius acta à Stephano VI. omnia rescissa sunt. Si ergo fide divinâ & certâ Innocentium Pontificem esse non constat; non etiam certa divinaque fide constabit, quæ ab illo decernuntur, certa esse, & ad dogma, si hoc declaret, spectare.

Rz. Hanc objectionem nimium sibi sumere, & si quid probet, non in Pontifices tantum, sed in omnia Concilia, in totam Ecclesiam, & intima fidei Catholicæ viscera grassari: si enī certâ, indubiaque fide non constat Innocentium XI. legitimum Papam esse: ergo nec Innocentium X. nec Clementem IX. nec Alexandrum VII. nec Leonem, nec Agathonem, nec Sylvestrum: in omnibus enim aut nulla subest dubitandi ratio, aut eadem. Si ergo Pontifices, & ab illis definita dubia sunt; ergo etiam quæ à Conci-

556 Lib. III. §. IX. Respondetur ad objecta

ciliis, nam hæc à Pontifice confirmantur, & sine Pontifice tam sunt
integra, quam corpus capite suo truncum. Immò ex iisdem cau-
sis, quæ tibi Pontifices, eorumque electiones dubias faciunt, ipsa
etiam Concilia in dubium vocantur, quæ ut sint legitima, multo
pluribus, quam Pontifices opus habent: dubio vero Pontifice, du-
biis Conciliis, dubiis etiam quæ ab illis constituta sunt, quid super-
est in fide certum? frustra Ariana hæresis, frustra Nestoriana, Euty-
chiana, Lutherana, Calvinistica, frustra omnes hæreses damnatae,
nam ut tu dicas, incerti erant Papæ, incerta Concilia, incertab u-
trisque decisæ; quæ vero incerta sunt, nec ad hæresin, nec ad fidem
pertinent, ut credi necessariò negativè debeat. Quod si nemo au-
det Concilia, quæ ab Ecclesia recepta sunt, in dubium vocare, immò
qui hoc agit, æquè ac qui Evangelia non recipit, hereticus est, teste
D. Gregorio *in c. sicut. d. 15.* idem de Pontifice Romano dicendum
est, par enim, ut paulo ante norayimus, de utrisque est ratio. Et si-
ut ad fidem non sufficit credere aliquam in genere Ecclesiam, & non
istam determinatam; aut alias scripturas sacras, sed non istas,
quas manibus terimus; ita nec sufficit, aliquem in Ecclesia Vicar-
ium, aliquid caput visibile, aliquem Judicem Controversiarum,
sed non istum, quem Ecclesia elegit, quem Ecclesia colit, à quo le-
ges & decreta, ac in rebus controversi sententiæ procedunt. Quan-
do navigabis, quando litem absolves, quando finem morbo impo-
nes, si aliquam quidem navim, aliquem judicem, aliquem medicum
velis, sed nullum certum, nullumque, quem possis digito ostende-
re, nec istum, nec illum admittas; sic pessimè consultum Ecclesia,
pessimè fidelibus, si Christum nullum illis Pontificem dedit, cum in
mornm, nùm in fidei decretis certam fidem deberent, certamque ob-
edientiam. Nec in Ecclesia tot retrò saeculis, & hereticis toties in
Romanam, sedem armatis auditum aliquando est, hanc Pontifici-
bus eorumque Decretis exceptionem oppositam esse, quod videlicet
non certò constaret Leonem, Sylvestrum, Damasum legitimos Papas
esse: quanti putas hoc inventum Ariani emissent, ut Nicæno Con-
cilio litem inferrent, & quæ illic Patres deciderant, inania redderent?
sed hoc nostro saeculo, in quo tanta novarum rerum cupido est, vi-
simus antiquitatem, novo artificio reperto, ut Papam sine Papa, le-

gem.

gem sine lege , sententiam sine sententia habemus , hoc est , aliquem Papam , sed non istum , aliquem Legislatorem , sed non istum , aliquem Judicem , sed non istum , nullumque certum ; captâ interim credendi faciendiisque quod placet libertate . Denique post Concilium Constantiense vix intelligimus , quomodo negari possit certâ fide hunc in individuo Pontificem pro vero legitimâque habendum esse , *seff. enim ult.* Martinus Papa sacro approbante Concilio , ab hereticis , qui Ecclesiæ Catholice conjungi volunt , ante omnia exigendum esse dicit : *Ut credant Papam Canonice electum , qui pro tempore fuerit , ejus nomine expresso esse successorem Petri , & supremam habere in Ecclesia potestatem.* Supponit ergo Concilium , credi posse fide divinâ , (nec enim de alia fide quam divina heretici sunt interrogandi ,) hunc numero & determinatum Pontificem legitimum esse Christi Vicarium , immo credi debere , nec enim quæ credi non possunt , aut non debent , necessariò credenda sunt .

Dices : Concilium loqui de Pontifice canonice electo , at non constare canonice electum esse .

Respondemus : Si constare certâ fide non potest Papam Canonice electum esse , cur ergo Concilium tam accuratè vult hereticos de hoc interrogari ? erit enim otiosa minimeque necessaria interrogatio , cum sicut constare non potest esse canonice & validè electum , ita nec legitimum Pontificem Christique Vicarium . At Papam legitimè baptizatum , ordinatum , electumque esse Deus nunquam revelavit , qui ergo credi potest ? Immo tunc revelavit , cum tota Ecclesia Pontificem pro legitimo habuit recepitque ; vox enim & testimonium Ecclesiæ , quæ falli non potest , vox est & testimonium Dei : sicut enim Deus nunc verbo , nunc litterâ , nunc miraculis , ita vocibus & assensu Ecclesiæ loquitur , juxta illud Christi Domini pollicitum : Non enim vos estis qui loquimini , sed spiritus Patris vestri , qui loquitur in vobis ; ipse spiritus docebit vos omnem veritatem .

Ad Dei ergo providentiam curamque pertinet , ut Ecclesiam , quam voluit esse columnam & firmamentum veritatis , in re tanti momenti errare non permittat , eumque pro Pontifice colere , qui Pontifex non est ; aut si permittat circa personam ipsam Pontificis errare , non permittat tamen circa auctoritatem , hoc est , putatio Pontifici eam ipsam auctoritatem potestatēque , quam vero

Aaaa 3

tribuat .

558 Lib. III. §. IX. ¶ ad objecta contra infallibil. S. Pont. tribuat, quemadmodum leges humanæ id ipsum in putatitio judice, teste, & matrimonio statuant in l. Barbarius de off. Praet. l. 3. infine ff. desuppellect. legat. l. 3. ff. ad S. C. M. §. 7. Institut. de Testam. ordin. c. in famis 3. q. 7. c. penult. Et ulti qui filii sint legitimi.

XVIII. Non obstat 18. Eorum sententiam, qui pontificem extra Concilium falli posse affirmant, probabilem esse, ergo illam tunc amplecti, docere, & si res ferat, exercere etiam possumus.

¶ Sententiae alicujus probabilitatem ex duobus capitibus stimari: ex rationum videlicet gravitate ac momentis; & ex docentium auctoritate. Rationes quod attinet, aut nullæ pro contraria sententia producuntur, aut tam infirmæ fragilesque, & soluta tam faciles, ut ad flectendum in unam partem intellectum, ejusque assensum non disco extorquendum, sed invitandum, pondus exiguum habent, immo nullum, si cum illis rationibus conferantur, quæ in oppositum urgent. Compara scripturas cum scripturis, Concilia cum Conciliis, Patres cum Patribus, Ecclesiæ usum cum usu, rationes cum rationibus, & tunc demum videbis, quam viarmovendo flectendoque intellectui habeant, quæ ab Adversariis dicuntur: revoca etiam in animum Patrum Doctorumque censuras, quibus sententiam illam configunt, & tecum reputa, an aliquam probabilitatis speciem agnoscant: & censuras non Patrum quorumcunque, sed sanctitatem & doctrinam florentium, quosque non ut Doctores tantum, sed ut fastigia & vertices Doctorum omnes scholæ venerantur. Vix pro sententia, quam impugnamus, octo decimque autores numerabis, ubi nostra omnes habet, quotquot ubique terrarum scripta. Quis enim est Gerson, Almainus, Adrianus, ut illos Thomæ Aquinatus, Alberto M. Bonaventuræ, Antonino, Bernardo, & omnibus ferè oppositas? Enimvero ad hos soles pallescunt illæ stellæ, dispersantque, & tam fieri non potest, ut qui istorum auctoritatem rationesque spectat, aliquam in contraria sententia probabilis rationem videat, quam ut lucente in meridie sole radii aliquid aut lucis in stellis observet: immo multo minus; cum in celo stellæ sint plurimæ, sol unus, à nobis vero soles sint plurimi, & ex adverso stellæ paucissimæ.

FINIS LIBRI TERTII.

LIBER

